



**Mensahe di Minister Presidente,
Mr. Henny Eman, na ocasion di
fayecimento di Sr. G.F. (Betico)
Croes.**

26 di November 1986

"Conciudadanonan,

Aruba a perde un gran yiu di tera.

Awe den oranan di marduga e noticia a drenta cu a comove henter nos comunidad.

Mientras cu podo dia pasa nos speranza y speranza di nos pueblo a lanta ora nos a wordo notifica cu tabata tin mehoracion den e situacion di Betico, diripiente den oranan di marduga nos a wordo sacudi cu e tristo noticia cu nos colega politico y yiu di tera a fayece.

Betico Croes su servicio y su compromiso pa cu nos pais y su dedicacion pa cu nos pueblo lo marca un lugar especial den historia di nos isla.

Logronan di su añanan den nos comunidad ta para ariba nan mes.

El a duna nos un sentido di orguyo di nos isla. E sentido calor di patriotismo cu ta reina ariba nos isla ta un tributo na dje.

Apesar cu nos tabata tin diferencianan filosofico, ora cu nos a yega na e deseo, e anhelo cu generacionnan largo ta biba den curazon di cada Arubiano, nos a comparti tereno di bataya.

E momentonan ey mi ta kere lo bay den historia como momentonan di mas importante di nos pais.

Status Aparte a trece yiu di tera hunto.

Su vision y su compromiso pa cu nos pueblo lo no muri. E tributo mas grandi cu nos por dune, ta pa nos tur, tur organisacion, tur partido, tur hunto haci Status Aparte, na locual el a duna su mihor añanan di bida, haci e Status Aparte locual nos pueblo merece.

Un Aruba cu lo bira e modelo den nos region di kico un pueblo y un democracia hunto por construi.

Su coleganan y nos den Parlamento lo haya falta di su liderazgo, su espirito bibo y e intensidad di su pensamentonan.

Conseho di Minister den su reunion extraordinario di awe a directa cu Diabierna lo ta un dia di luto. Den e oranan dificil aki nos pensamentonan ta bay specialmente na su yiunan,, su señora, tata, mama, rumannan, famianan y amigonan.

Den nomber di Gobierno di Aruba nos kier desea nan hopi forza den e momentonan dificil aki."

